

四庫全書

史部

欽定四庫全書

資治通鑑後編卷一百三十五

刑部尚書徐乾學撰

宋紀一百三十五

起旃蒙大淵獻七月盡屠維單閼十二月凡四年有六月

寧宗法天備道純德茂功仁文哲武聖睿恭孝皇

帝

嘉定八年秋七月戊午朔蒙古取金濟源縣 辛酉以

鄭昭先參知政事禮部尚書曾徒龍僉書樞密院事

壬戌詔四川立楊巨源廟名曰褒忠 庚辰詔皇弟摢更名思正皇姪均更名貴和 金主聞河北譏察官有要求民財始聽民渡河者避兵民至或餓死自溺特命御史臺體訪之 金尚書省奏給皇太孫歲賜錢金主不從曰襁褓兒安所用之 金改交鈔名貞祐寶券自泰和以來交鈔日多而輕乃更作二十貫至百貫二百貫千貫謂之大鈔初雖稍重未幾益輕而愈滯市邑視為無益之物富家內困藏鋌之限外散交鈔屢更皆至

窘敗謂之坐化商人往往舟運貿易于江淮錢多入宋矣至是改名而敝如故 紅羅山寨主杜秀降于蒙古以秀為錦州節度使 蒙古主駐軍魚兒灘遣僧格巴圖帥萬騎自西夏趨京兆以攻金潼關不能下乃由嵩山小路趨汝州遇山澗輒以鐵槍相鎖連接為橋以渡遂赴汴京金主急召花帽軍於山東蒙古兵至杏花營距汴京二十里花帽軍擊敗之蒙古兵還至陝州適河水合遂渡而北金人專守闕輔時蒙古兵所向皆下金

主遣使求和蒙古主欲許之謂薩木哈曰辟如圍場中
獐鹿吾已取之矣獨餘一兔盍遂舍之薩木哈耻於無
功不從遣奇識哩謂金主曰若欲議和以河北山東未
下諸城來獻及去帝號稱臣當封汝為河南王議遂不
成 八月己丑賜張栻謚曰宣 蒙古遣史天倪南伐
授右副都元帥賜金虎符是月取金平州經畧使奇珠
降 蒙古穆呼哩遣史進道等攻廣寧府降之 是月
蘭州盜程彥暉求內附四川制置使董居誼却之 九

月乙亥申嚴兩浙圍田之禁 紅襖賊周元兒陷金深
祁二州東鹿安平無極等縣真定帥府以計破之斬元
兒及其黨五百餘人 是秋蒙古取金城邑凡八百六
十有二 冬十月江東計度轉運副使真德秀朝辭上
奏曰金自南遷其勢日蹙塔坦西夏東出潼關深入許
鄭攻圍都邑遊騎布滿山東而金以河南數州之地抗
西北方張之師加以羣盜縱橫叛者四起危急如此臣
謹按國史女真叛遼在政和甲午其滅遼也在宣和己

已而犯中原即於是年之冬今日天下之勢何以異政宣之時陛下亦宜以政宣為監夫以皇皇鉅宋八葉重光至於政宣燕安湛溺之餘紀綱蕩然無一足恃本根既撥枝葉從之於是女真得以逞其凶殘攻陷我城都傾覆我社稷創遭我二聖荼毒我烝民自開闢以來禍未有若是之酷也臣觀塔坦之在今日無異昔日女真方興之時一旦與吾為鄰亦必祖述女真已行之故智蓋女真嘗以燕城歸我矣今獨不能還吾河南之地以

觀吾之所處乎受之則享虛名而召實禍不受則彼得
以陵寢為辭仗大義以見攻女真嘗與吾通好矣今獨
不能卑辭遣使以觀吾之所啟乎從之則要索無厭豈
能滿其谿壑之欲不從則彼得藉口以開釁端不可不
預圖所以應之也因以五不可為獻一曰宗社之耻不
可忌二曰比鄰之盜不可輕三曰幸安之謀不可恃四
曰薦諛之言不可聽五曰至公之論不可忽反覆極言
帝不能用金以衍聖公孔元措為太常博士或言宣

聖墳廟在曲阜宜遣之奉祀金主以元措聖人之後山東寇盜縱橫恐罹其害是使之奉祀而反絕之也故有是命 夏人寇金保安延安陷臨洮 金宣撫使富森鄂諾據遼東僭稱天王國號大真改元天泰 十一月丙辰朔封伯澤為安定郡王 金王世安獻取盱眙楚州之策金主以為淮南招撫使選謀勇二三人同往淮南招紅襖賊及宋官自是南侵之謀興矣 夏人寇金綏德及熟羊寨皆為守將所敗 蒙古兵徇彰德府

知府特們實呼死之 蒙古史天祥攻金興州擒節使
使趙守玉 蒙古兵攻破東京赫特赫娶萬努之妻李
儻娥璫格不直之有隙既而納蘓茂等勸璫格稱帝璫
格曰向者吾與阿禪納延盟願附大蒙古國削平疆宇
倘食其言而自為東帝是逆天也逆天者必有大咎衆
請愈力璫格稱疾不出潛與其子錫沙奉金幣九十車
入覲于蒙古蒙古主曰漢人先納款者先引見太傅阿
海曰劉伯林納款最先帝曰伯林雖先然迫於重圍而

來未若璫格仗義效順也其先璫格既見蒙古主大悅
因問舊何官對曰遼王命賜金虎符仍遼王又問戶籍
幾何對曰六十餘萬蒙古主曰可發三千人為質朕發
蒙古三百人往取之璫格遣奇諾等與俱且命拘繫赫
特赫以來赫特赫懼與納蘿茂等給其衆曰璫格已死
遂以其衆叛殺所遣三百人唯三人逃歸 十二月乙

酉朔金徙湖州民分屯嵐石隰吉絳解等州 壬辰金
太康縣人劉全時溫東平府民李寧謀反伏誅 乙巳

蒙古兵徇金太名府 癸丑金皇太孫鏗卒謚冲懷

蒙古以張鯨總北京十控行兵從圖呼勒實喇卜南伐

鯨懷反側穆呼哩覺之令蕭額森監其軍至平州鯨稱

疾不進額森執而殺之鯨弟致殺長史據錦州自稱瀛

王改元興隆下平灤瑞利義懿廣寧等州穆呼哩率先

鋒蒙古巴哈權帥烏葉爾等軍討之

考異元史太祖紀
云張致僕號漢興

皇帝改元興龍今從
從陳徑通鑑續編

是歲雨浙江東西路旱蝗

九年春正月乙丑賜呂祖謙謚曰成 庚午蒙古取金曹

州己卯金立皇子遂王守禮為皇太子母皇后溫都氏
二月甲申朔日有食之 命命皇太子守禮控制樞
密院事以金鑄撫軍之寶授太子啟稟之際用之 蒙
古圍金太原府 己亥蒙古兵攻下金霍山諸隘 辛
亥東西兩川地大震 金同知觀州張開復河間府滄
獻等州並屬縣十三 三月乙卯東西兩川地震甲子
又震馬湖夷界山崩八十里江水不通丁卯又震壬申
又震 是月金復恩邢二州 夏四月癸丑金張開奏

復清州等十一城 甲午金改賜皇太子守禮名守緒

戊戌泰州人唐進與其徒何進等引衆十萬來歸四

川制置使董居誼拒却之 五月癸酉太白晝見 金

來遠鎮獲謀者陳岊等知夏人將圖鞏州關長安命陝

西行省嚴為之備夏人修來羌城界河橋元帥右都監

完顏賽巴遣兵焚之俘馘甚多 六月辛卯西川地震

壬辰又震乙未又震黎州山崩 丁未金改宣撫司為

經畧司 張致降金金以致行北京路元帥府事 秋

七月癸丑朔金昭義軍節度使以必嚙咱阿嚙岱復威州及獲鹿縣。金侯摯移行省于東平。獲紅襖賊訊知其渠帥，郝定僭號署官改元已，攻陷滕充單諸州，萊蕪新泰等十餘縣道路不通。摯帥師進擊，執定送南京誅之。

閏月壬午朔日有食之

考異宋史不書今據金史宣宗紀書之

辛卯金

復深州。八月金定僧道納栗補威儀監寺之令。夏

人入金安塞堡，元帥左監軍烏特呼圖克遣軍敗之。

丙子蒙古攻金延安。己卯夏人入金結耶觜川守將

擊走之 九月辛巳朔蒙古攻金坊州命御史大夫永
錫領兵赴陝西便宜從事 壬辰蒙古攻金代州經畧
使鄂屯綽華善死之 蒙古薩勒珠岱薩木哈巴圖
爾率師由西夏趨關中冬十月赴潼關金安西軍節度
使尼瑪哈富勒呼戰沒 癸亥西川地震甲子又震
金徙衛紹王鎬厲王家屬於南京 蒙古兵次嵩汝間
金御史臺言敵兵踰潼關墮沔深入重地近抵西郊彼
知京師屯宿重兵不復叩城索戰但以遊騎遮絕道路

而別兵攻擊州縣是亦困京師之漸也若專以城守為事中都之危又將見于今日况公私蓄積視中都百不及一此臣等所以寒心也願陛下命陝西兵扼拒潼關與阿里布色為犄角之勢選在京勇敢之將十數人各付精兵隨宜伺察且戰且守復諭河北亦以此待之金主以奏付尚書省平章珠赫果勒齊曰臺官素不習兵備禁方畧非所知也遂止勒齊以蒙古兵日逼欲以重兵屯駐汴京以自固州縣殘破不復恤金主惑之國勢益

哀 金河南行省胥鼎遣潞州元帥左監軍必噜咱阿噜岱以軍一萬孟州經畧使圖克坦伯嘉以軍五千由便道濟河趣關陝自將平陽精兵援南京金主命樞府督軍應之 金行樞密院知河南府事完顏哈達以徵兵失應坐誅 金布希萬努降于蒙古以其子特爾格入侍既而復叛僭稱東夏 十一月乙酉金元帥右都監完顏薩巴奏大敗夏人于定西 蒙古兵次于汚池金右副元帥富察阿哩巴遜軍潰而遁 金胥鼎慮蒙古兵扼

戰乃檄絳解隰吉孟五州經畧司相與會師為夾攻之勢及蒙古自三門集津北渡至平陽鼎遣兵拒戰蒙古兵敗去金人復潼關 金河南路統軍使赫舍哩薩哈勒以發兵後期坐誅 蒙古穆呼哩以張致兵精且依險為阻欲設奇取之乃遣烏葉爾等別政溜石山堡且諭之曰汝等急攻溜石賊必遣兵往援我出其不意斷其歸路可一戰擒也又令蒙古巴哈別屯永德縣四十里以伺之致聞溜石被圍果以兵救蒙古巴哈遣騎扼其

歸路且馳報穆呼哩夜半引軍疾馳比曙抵神水與致
遇蒙古巴哈兵亦會前後夾擊大破之致遂奔潰進圍
錦州致屢戰不利乃閉門拒守月餘其監軍高益縛致
出降穆呼哩殺之十二月癸亥蒙古攻金平陽丙
寅蒙古攻金大名府壬申蒙古兵進自代州神仙橫
城及平定承天鎮諸隘攻太原府金宣撫使烏庫哩禮
遣人間道齎誓書至南京告急詔發潞州元帥府平陽
河中絳孟宣撫司兵援之乙亥金珠赫果勒齊請修南

京襄城金主曰民力已因此役一興病滋甚矣城雖完固朕亦何能安此乎是歲奇諾金山誠格勒通古裕等推鼐爾薩巴僭帝號于澄州國號遼改元天威以遼王璫格兄都呼為平章置百官方閱月其元帥誠格勒叛歸于金鼐爾薩巴為其下所殺推其丞相奇諾監國與其行元帥雅爾分兵民為左右翼屯開保州關金蓋州守將衆嘉努引兵攻敗之璫格引蒙古軍數千適至得兄都呼並妻約羅氏戶二千雅爾引敗軍東走璫格追擊之還渡

遼河招撫懿州廣寧徙居臨潢府奇諾走高麗為金山所殺金山又自稱國王改元天德通古裕復殺金山而自立錫沙又殺之亦自立

十年春正月癸未賀正旦使陳伯震自金辭還金主謂宰臣曰聞恩州南境有盜此乃彼界饑民沿淮為亂耳宋人何故攻我珠赫果勒齊請伐之以廣疆土金主曰朕意不然但能守祖宗所付足矣安事外討

考異陳經通鑑續編云陳

伯震將還金主謂之曰聞恩州南境有盜此乃彼界饑民沿淮為亂耳宋人何故攻我蓋自金有蒙古之難宋

不遣歲幣者六年珠赫果勒齊又以境土日蹙勸金主南侵以自廣金主曰但能守祖宗所付足矣安事外討勸齊言不已金主惑之故於伯震之陞辭言及以為用兵之端按金史宣宗紀前數語與宰臣言非與伯震言也且饑民為亂正為宋人解免之辭何得云言及以為用兵之端耶陳氏之外謬如此薛氏不能改今正之

癸丑雨土 乙巳蒙古攻金觀州 魏了翁狀奏臣聞

謚者之行迹昔人所以旌善而懲惡節惠而尊名也爰及後世限以品秩濶以請託於是嘗位大觀者雖惡猶特飾之品秩之所不逮則有碩德茂行而不見稱於世者矣夏竦高若訥而謚文莊蔡卞鄭居中而謚文正鄧

洵武蔡脩而謚文簡呂惠卿而謚文節張商英而謚文忠強淵明而謚文獻林希而謚文節溫益而謚定簡汪伯彥而謚忠定秦檜而謚忠獻此皆名浮於行而章章在人耳目者自餘此類又何可勝數而舉世視為當然未嘗以為訝也至於倡明正學於千有餘載之後上嗣去聖下開來哲如周敦頤程顥程頤張載及一時艾叔高第其有功於生民之類亦不為少矣世之相後不為近矣而卒未有表而出之者人亦不以為闕也臣竊為

之不平久矣迺自前歲誤被簡擢攝承漕寄遂因職分
所關輒為周敦頤冒陳易名之請已荷聖明俞允以所
奏下之有司維時春官亦專以程顥兄弟為請申命所
司而二三年于茲猶未有以易其名者豈事大體未容
以輕議耶望申飭有司速加考訂俾隆名美謚早有以
風厲四方亦學士大夫趨嚮之的也 金主選兵三萬
五千付圖們呼圖美統之西征尚書左丞相胥鼎馳奏
以為非便畧曰自北兵經過之後民食不給兵力不完

若又出師非獨饋運為勞而民將流亡愈至失所或宋人乘隙而動復何以制之此繫國家社稷大計方今事勢止當備禦南邊西征未可議也遂止 二月戊申朔金初用貞祐通寶凡一貫當貞祐寶券十貫 癸丑金罷招賢所 乙卯金皇孫生 壬申地震 壬戌金尚書省以軍儲不繼請罷州府學生廩給主曰自古文武並用向在中都設學養士猶未嘗廢況今日乎其令仍舊給之 三月金主徵山東兵接應苗道潤共復中

都而石海方據真定叛慮為所梗乃集鈕祜祿貞郭文振及威州刺史武仙所部精銳與東平軍為犄角之勢圖之武仙率兵斬石海及其黨二百餘人降葛仲趙林張立等軍盡獲海僭物遂以武仙權知真定府事初

王世安獻取盱眙楚州之策金主以為淮南招撫使遂有南侵之謀珠赫果勒齊復勸侵宋不已金主惑之至是命烏特呼圖克完顏薩巴帥師南侵遂渡淮夏四月丁未朔犯光州中渡鎮執榷場官盛允升殺之慶壽分兵

犯樊城圍棗陽化軍別遣完顏阿林入大散關以攻
西和階成州朝廷聞之詔京湖江淮四川制置使趙方
李珏董居誼俱便宜行事以禦之先是金右司諫許古
上疏請遣使與宋議和則塔坦聞之亦將歛跡不宜用
兵以益敵金主即命古草議和諜文既成以示宰臣乃
皆曰辭有哀祈之意徒自示微弱無足取者議遂寢平
章政事胥鼎亦切諫南侵有六不可果斂聲不從金主以
南北用兵西夏復擾財匱兵弱為憂集百官議守禦之

金濟南泰安滕充等

州賊並起皆劉二祖餘黨侯摯遣完顏霆率兵討之自

清河出徐州破斬霍儀招降偽元帥石珪夏全餘衆皆

潰金人犯襄陽棗陽趙方語其子范葵曰朝廷和戰

未定益亂人意惟有提兵臨邊決戰以報國爾遂抗疏

主戰因親往襄陽檄統制扈再興陳祥鉉轄孟宗政等

禦之仍增戍光化信陽均州以聯聲勢金人來自圍山

勢如風雨再興等分三陳設伏以待既至再興中出一

陳復卻金人逐之宗政與祥合左右兩翼掩擊之金人三面受敵大敗血肉枕藉山谷間尋報棗陽圍急宗政午發峴首遲明抵棗陽馳突如神金人大駭宵遁方以宗政權知棗陽軍未幾京湖將王辛劉世興亦敗金兵于光山隨州金人乃去五月甲申賜禮部進士吳潛以下五百二十三人及第出身癸卯趙方請以伐金詔天下遂傳檄招諭中原官吏軍民六月庚戌太白晝見東川大水秋七月丙子朔日有食之丁亥嗣

漢王不儔卒 時李全等出沒島嶼寶貨山積而不得食相率食人會鎮江武鋒卒沈鐸亡命山陽誘致米商斗米取售數十倍知楚州應純之償以玉貨北人至者輒舍之鐸因說純之以歸銅錢為名弛渡淮之禁由是來者莫可遏初楊安兒有意歸朝定遠民季先大俠劉佑之廝養也嘗隨佑部納客山陽安兒處以軍職安兒死先至山陽寘緣鐸得見純之道山東豪傑願歸正之意純之命先譏察諭意羣豪以鐸為武鋒副將與高忠

皎各集忠義民兵分二道伐金先遂以全五千人附忠
皎忠皎與合兵攻海州糧援不繼退屯東海純之見北
軍屢捷密聞于朝謂中原可復時頻歲小稔朝野無事
丞相史彌遠鑒開禧之事不明招納密勅純之慰接之
號忠義軍就聽節制給忠義糧於是東海馬良高林宋
德珍等萬人輻輳連水李全等羨心焉 八月壬子金
削御史大夫永錫官爵有司論失律當斬金主以近族
特貰其死 蒙古主以穆呼哩有佐命功拜太師封國

王承制行事賜誓券命印分鴻吉哩等十軍及蕃漢諸軍並隸麾下建行省于燕雲且謂之曰太行之北朕自經畧太行之南卿其勉之穆呼哩乃自中都南攻遂城及蠡州皆下之初蠡州拒守力屈乃降穆呼哩怒將屠其城州人趙瑨從穆呼哩為署百戶泣曰母與兄在城中乞以一身贖一城之命哀懇切至穆呼哩義而許之九月壬午金改元興定癸巳金遼東行省完顏阿里布色為叛人伯特呼圖克所殺是月蒙古取金磁州

又取鄒平長山淄川縣 冬十月金以河南為中京會
昌府 十一月庚辰太白晝見 蒙古取金濱棣博淄
四州 十二月甲辰蒙古攻金潞州都統馬甫死之

戊申以軍興募民納粟補官 金即墨移風砦於大船
中得日本國太宰府民七十二人因糴遇風飄至中國
有司覆驗無他詔給以糧俾還本國 庚戌蒙古取金
益都府辛酉取密州節度使完顏寘死之 癸酉金完
顏寘以步騎萬人犯四川戊辰迫湫池堡己巳破天水

軍守臣黃炎孫遁金人攻白環堡破之庚午迫黃牛堡
統制劉雄棄大散關遁李全及其兄福襲金青營州
取之是歲金延州刺史烏蘇克竇克言近世河離故道
自衛東南而流由徐邳入海以此河南之地為狹竊見
新鄉縣西河水可決使東北流其南有舊堤水不能溢
行五十餘里與清河合由清州柳口入海此河之舊道
也皆有故堤補其缺罅足矣如此則山東大名等路皆
在河南而河北諸郡亦得其半退足以備禦之計進

足以壯恢復之圖議者以為河流東南已久決之恐故
道不容衍溢而出遂寢

十一年春正月壬子李全率衆來歸詔以全為京東路
總管 戊子金人圍皂郊堡 丁酉金人犯隔芽關興
元都統李貴遁官軍大潰 是月金陝西行省奏蒙古
圍夏興州夏國主遵頊命其子居守而出走西涼 二
月甲辰金人焚大散關而去 丙午金人破皂郊堡死
者五萬人先是安丙約夏人會師攻秦鞏夏人不至遂

有此敗 丁未金人破湫池堡 戊申金人圍隨州棗
陽軍孟宗政初視事一愛僕犯令立斬之軍民股栗於
是築堤積水修治城堞簡閱軍士完顏賽巴擁步騎圍
城宗政與扈再興合兵角敵歷三月大小七十餘戰宗
政身先士卒金人戰輒敗忿甚周城開濠列兵濠外以
綯鈴吠犬自警宗政募壯士乘間突擊金人不能支盛
兵薄城宗政隨方力拒隨州守許國援師至白水鼓聲
相聞宗政率諸將出戰金人奔潰 丙辰白虹貫日

三月丁丑金人焚湫池堡而去 戊子利州統制王逸等帥官軍及忠義人十萬復大散關及皂郊堡追斬金副統軍完顏贊進攻秦州至赤谷口逸傳沔州都統劉昌祖之命退師且放散忠義人軍遂大潰 癸巳金包長壽合長安鳳翔之衆復攻皂郊遂趣西和州 是日鎮江忠義統制彭惟誠等兵敗於泗州 丙申劉昌祖焚西和州遁守臣楊克家棄城去遂為金人所陷 夏四月甲辰劉昌祖焚成州遁守臣羅仲甲棄城去是日

人去成州 戊午金人復犯大散關守臣王立遁已未
金人犯黃牛堡興元都統吳政拒退之癸亥政至大散
關斬立以徇金人連破諸州前後獲糧九萬斛錢數千
萬軍實不可勝計事聞政進三官昌祖安置韶州克家
等各責遠州居住 金阿里布色自潼關之敗失其所
在變姓名匿居柘城為御史覺察繫其家屬將窮治之
乃遣子上書詣吏待罪臺臣請誅之以懲不忠金主卒

赦其罪諭以自效 五月癸未蚩尤旗見長竟天 金
苗道潤素與中都經畧副使賈瑀有隙道潤從數騎行
瑀伏甲射之道潤顛于道左遂卒瑀不自安遣使告道
潤將張柔曰吾得除道潤者以君不助兵故也柔怒叱
使者曰瑀殺吾所事吾食瑀肉且未足快意反以此言
相戲耶遂檄召道潤部曲告以復讐之意衆皆羅拜推
柔為長柔會兵趣中山蒙古兵出自紫荆關柔遇之遂
戰于狼牙嶺柔馬跌被執見主帥明安柔不跪左右强

之柔叱曰彼帥我亦帥也死即死終不偷生為他人屈
明安壯而釋之潰卒稍集明安恐柔為變質其二親于
燕京柔乃降蒙古以柔為河北都元帥 蒙古兵徇錦
州元帥劉仲亨死之 六月甲辰金樞密院言賈璫等
殺苗道潤乞治其罪金主曰道潤之衆亟収集之璫等
是非未明姑置勿問 秋七月庚午朔日有食之考異
宋史

不書今據金史
宣宗紀書之

癸酉奪知天水軍黃炎孫三官辰州
居住 乙酉修孝宗寶訓 八月蒙古穆呼哩率步騎

數萬自太和嶺徇河東取金代隰二州九月乙亥破太原府元帥烏庫哩德升力拒之城西北隅壞德升聯車塞其處三却三登矢石如雨守陴者不能立城破德升自縊而死其姑及妻皆自殺 蒙古兵徇金汾州節度使烏雅額徹呼死之 辛卯安定郡王伯澤卒 是月李全破金密州及壽光縣 冬十月蒙古徇金絳潞壬子攻平陽提控郭用死之行省參政李革守平陽兵少援絕癸丑城陷或謂革宜上馬突圍出革歎曰吾不能

保此何面目見天子汝輩可去矣遂自殺是月李全破
鄒平臨朐安丘等縣金提控王顯死焉十一月壬子
金人犯安豐黃口灘陝西人張羽來歸蒙古取金
潞州元帥右監軍納哈塔富拉塔參議官王良臣死之
十二月金主欲乘勝來議和以開封府治中呂子羽為
詳問使至淮中流不納金主怒以布薩安貞為左副元
帥輔太子守緒會師南侵是歲契丹陸格據高麗江
東城蒙古遣哈準扎拉率師平之高麗王曠遂降請歲

貢方物 遼王璿格引蒙古契丹軍及東夏國元帥呼圖克兵十萬圍哈沙高麗助兵四十萬克之哈實自經死徙其民於西樓

十二年春正月戊辰朔召四川制置使董居誼赴行在居誼黷貨所至輒敗故召還以聶子述代之 戊子金人犯成州都統張威自西和州退守仙人原 辛卯金人復寇西和州守將趙彥呐設伏待之殲其衆 甲午金人破鳳州夷其城 乙未興元都統吳政及金人戰

于黃牛堡死之。金主謂宰臣曰：頃近侍還自陝西謂
巴薩已得鳳州，如得武休關，將遂取蜀。朕意殊不然。假
令得之，亦何可守？此舉蓋為宋人渝盟初，豈貪其土地
耶？朕重惜生靈，惟和議早成，為佳耳。二月庚子，太白
晝見。癸卯，金人乘勝破武休關，都統李貴遁還。丁
未，金人破興元府權府事趙希旨棄城走。庚戌，以曾
從龍同知樞密院事兼江淮宣撫使吏部尚書任希夷
僉書樞密院事。辛亥，金人破大安軍，遂破洋州。壬子

四川制置使董居誼遁張威使石宣邀擊金人大破之
殲精兵三千人俘其將巴圖魯安乃遁去 金完顏額
克復大舉圍棗陽擊其外繞以土城趙方遣統制扈再
興等引兵三萬餘分道出攻唐鄧二州又命其子范監
軍葵為後殿 乙丑夏人復以書來四川議夾攻金人
利州安撫丁焻許之 三月己巳以鄭昭先知樞密院
事 癸酉金人復入洋州焚其城而去 丁亥太白晝
見 癸巳雨土 甲午金人自盱眙退師 閏月癸亥

興元軍張福莫簡等作亂以紅巾為號是春金人圍安豐軍及滁濠光三州江淮制置使李珏命池州都統武師道忠義軍都統制陳孝忠殺之皆不克進金人遂分兵自光州犯麻城自濠州犯石磧自盱眙犯全椒來安天長六合淮南流民渡江避亂諸城悉閉金遊騎數百至采石楊林渡建康大震時賈涉以淮東提刑知楚州節制京東忠義慮忠義人為金所用亟遣陳孝忠石珪夏全時青季先葛平楊德廣等趣滁濠命李全要其

歸路全進至渦口與金左都監赫舍哩約赫德駙馬阿海連戰於化湖陂殺金將數人得其金牌金人乃解諸州之圍而去全追擊復敗之於曹家莊金人自是不敢窺淮東初賈涉募能殺金太子者賞節度使殺親王者賞承宣使殺駙馬者賞觀察使全因致所得金牌紿涉云殺駙馬阿海所獲涉請授全廣州觀察使夏四月癸未金陝西黑風晝起有聲如雷地大震癸巳參知政事曾從龍罷張福莫簡等擁衆入利州鼎子述退

保劔門檄醴泉觀使安丙子癸仲兼節制軍馬討賊癸
仲召都統張威等帥兵來會福等殺總領財賦楊九鼎
掠閬果二州四川大震趙方魏了翁移書宰執謂安丙
不起賊未即平蜀未可定遂以丙為四川宣撫使董居
誼落職奪三官時李壁李壘並鎮潼皆以國事勉丙

五月己亥太學生何處恬等伏闈上書以工部尚書胡
槩欲和金人請誅之以謝天下 金築南京裏城以珠
赫果勒齊固請也金主慮擾民募人能致甓五十萬者遷

一官百萬升一等於是平陽判官完顏阿喇左廂譏察霍定和發蔡京故居得覽二百萬有奇准格遷賞金主問曰人言此役恐不能就如何果勒齊曰終當告成但其濠未及浚耳金主曰無濠可乎果勒齊曰苟防城有法正使兵來臣等愈得効力金主曰與其臨城曷若不令至此為善果勒齊無以對及城成果勒齊金鼎之賞建碑書功于會朝門蒙古使張柔帥兵南下遂克雄易保安諸州賈瑀窮據孔山臺柔攻之不下臺無水汲山下柔斷其汲道瑀窮乃降

柔剖其心以祭苗道潤引兵次滿城金將武仙會鎮定深
冀兵數萬攻之柔全軍適出帳下才數百人柔命老弱婦
女乘城自率壯士突出仙兵後毀其攻具從數騎策馬杖
槊大呼曰園仙衆皆披靡復使緣山多張旗幟聲言救至
曳柴揚塵鼓噪以進仙兵大敗追擊之尸橫數十里柔乘勝
攻完州下之于是祁陽曲陽等帥皆降于柔柔遂圍中山府
仙遣其將葛鐵鎗與柔戰于新樂飛矢中柔頰落其二齒柔
拔矢戰葛大敗死者數千人仙復遣劉成攻柔柔又敗之遂

南掠金鼓城深澤寧晉諸縣由是深冀以北鎮定以東三十餘城望風降附柔之威名震于河朔 六月張福擁衆薄遂寧權府事程遇孫棄城走福入遂寧焚其城遂入普州守臣張已之棄城走福屯于普州之茗山安丙自果州如遂寧令諸軍合圍絕其樵汲以困之庚午張威引兵至福窮請降威執之以獻于丙 辛未太白晝見 辛巳西川地震太白晝見 丁亥嗣濮王不標卒 辛卯太白經天 癸巳丁晴復以書約夏人伐金

西域殺蒙古使者蒙古主親征取額特埒城擒其酋

哈扎爾濟蘭圖

秋七月丙申張福伏誅張威又捕賊

衆千餘人誅之莫簡自殺紅巾賊悉平再貶董居誼永

州居住金完顏額克擁步騎傳棗陽城孟宗政囊糠

盛沙以覆樓棚列甕澑水以堤火募砲手擊之一砲輒

殺數人金人選精騎二千號弩子手擁雲梯天橋先登

又募鑿銀礮石工晝夜臨城運茅葦直抵圜楼下欲焚

樓宗政先燬樓掘深坑防地道創戰棚防城隕穿穴才

透即施毒煙烈火鼓譟以薰之金人窒以濕氈析路以
剗土城頽樓陷宗政撤樓益薪架火山以絕其路列勇
士以長鎗勁弩備其衝距樓陷所數丈築偃月城袤百
餘丈翼傅正城金人摘強兵披厚鎧氈衫鐵面而前又
濕氈濡草蒙火山覆以冰雪擁雲梯徑抵西北圈樓登
城城中軍以長戈畚其喉殺之敢勇軍自下夾擊金兵
墜死燎燭宗政激將士血戰凡十五陣金人連不得志
會扈再興許國兩道並進掠唐鄧境焚其城棚糧儲金

頓兵棗陽城下八十餘日趙方知其氣竭乃召國再興還併東師隸于再興尅期合戰再興敗金人於瀼河又敗之城南宗政自城中出擊內外合勢士氣大振賈勇入金營自晡至三更殺其衆三萬金人大潰額克單騎遁獲其貨糧器甲不可勝計追至馬磴寨焚其城入鄧州而還金人自是不敢窺襄陽棗陽中原遺民來歸以萬數宗政發廩贍之給田創屋籍其勇壯號忠順軍俾出沒唐鄧間宗政由是威振境外李全引兵至齊州

金守臣王贊以城降。八月戊辰復合利州東西路為一。蒙古取金武州判官郭秀死之。又取合河縣令喬天翼死之。九月丙午以賈涉主管淮東制置司公事兼節制京東河北軍馬。初山東來歸者日衆而石珪以計殺沈鐸應純之。亦罷去。權楚州梁丙無以贍之。李先乞預借兩月糧然後帥所部五千並馬良等萬人往密州就食丙不許。先又請速遣李全代領其衆丙亦不許。而以珪權軍務。珪乃奪運糧之舟渡淮大掠至楚州南。

渡門焚毀幾盡丙遣人諭之不止時涉知盱貽軍上書
言忠義之人源源而來不立定額自為一軍處之北岸
則安能以有限之財應無窮之需饑則噬人飽則用命
其勢然也朝廷因命涉節制忠義人兵涉受命即遣傳
翼諭石珪楊德廣等以逆順禍福珪等乃謝罪涉慮其
人衆思亂因滌濠之役分石珪陳孝忠夏全為兩屯李
全為五砦又用陝西義勇法涇其手合諸軍汰者三萬
有奇涇者不滿六萬人正軍常屯七萬使主勝客朝廷

歲省費什三四至是分江淮制置司為沿江淮東西三
司命涉主管淮東初蒙古克益都不守而去益州府
卒張林與其黨復立府歸金以功為治中充陰不逞知
府田琢失衆心林逐琢遂據益都山東諸郡皆附之林
欲來歸以自固會李全自齊州還薄兵青州城下遣人
說林早附林恐全誘已猶豫未決全挺身入城惟數人
從林納之相見甚驩置酒結為兄弟全附表奉青州密
登萊離淄濱棣寧海濟南十二郡版籍來歸表辭有云

舉七十城之全齊歸三百年之舊主詔授林武翼大夫
京東安撫使兼京東總管是秋蒙古穆呼哩取金岢
嵐吉隰等州進攻絳州拔其城屠之十一月辛亥進
封楊次山為會稽郡王十二月乙亥築興元府城
京湖制置使趙方以金人屢敗必將同時並攻當先發
以制之己丑遣扈再興許國孟宗政帥師六萬分三道
伐金戒之曰毋深入毋攻城第潰其保甲燬其城砦空
其貨糧而已大雨雪淮冰合李全請于賈涉曰每恨

泗州阻水今如平地矣請取東西城自效涉許之全以
長鎗三千人半夜渡淮潛向泗之東城將踏濠氷傳城
下俄城上荻炬數百齊舉遙謂全曰賊李三偷城耶天
黑故以火燭之全知有備乃引兵還 金右丞相殊赫果
勒齊專固權寵擅作威福與平章政事高汝礪相倡和
果勒齊主機務汝礪掌利權附已者用不附者斥凡言事
忤意及負才力或與已頡頏者對金主陽稱其才使幹
當河北陰置之死地又以已為相不得兼樞密院帥以

攬兵乃與汝礪力勸金主南侵置河北于意外凡精兵皆集河南苟且歲月不肯出一卒以應方面之急至是使奴賽巴殺其妻因歸罪于賽巴而殺之以滅其口事覺金主久知其姦下之獄而殺之初金主將遷汴欲置紇寧于平州果勒齊難之及發中都金主戒果勒齊厚撫紇寧而聞多輒殺數人且勸金主取其元給器用故有孔達之難而中都以亡金主嘗歎曰壞天下者果勒齊固多也 是歲復京東河北二府九州四十縣

資治通鑑後編卷一百三十五

欽定四庫全書

史部

資治通鑑後編卷一百三十六至八十六

欽定四庫全書

史部

資治通鑑後編卷一百三十六至八十六

詳校官檢討臣德生

編修臣裴謙覆勘

總校官進士臣朱齡

校對官中書臣沈鳳輝

謄錄監生臣茅瑞

欽定四庫全書

資治通鑑後編卷一百三十六

刑部尚書徐乾學撰

宋紀一百三十六

起上章執徐正月盡閏
逢庚寅十二月凡五年

帝

寧宗法天備道純德茂功仁文哲武聖睿恭孝皇

嘉定十三年春正月丁酉扈再興攻鄧州許國攻唐州皆不克而還金人追之遂攻樊城趙方督諸將拒退之

蒙古破金好義堡霍州刺史伊喇阿里哈等死之

己酉以不凌為嗣濮王 戊午夏人復以書至四川議

夾攻金人 是月孟宗政敗金人于湖陽 三月辛卯

朔雨土 金紅襖賊于忙兒襲海州據之 夏四月庚

申朔淮東制置賈涉招諭山東兩河豪傑勸以來歸

金以河北山東地封滄州經畧使王福為滄海公以清

觀滄州鹽山無棣樂陵東光寧津吳橋將陵阜城蓆縣

隸之河間招撫使伊喇衆嘉努為河間公以獻蠡安深

州河間肅寧安平武強饒陽六家莊卽山寨隸之真定
經畧使武仙為恒山公以真定府沃冀威鎮寧平定州
抱犢寨欒城南宮縣隸之中都東路經畧使張甫為高
陽公以雄霸莫州高陽信安文武大成保定靜海寶城
武清安次縣隸之中都西路經畧使靖安民為易水公
以涿易安肅深州君民川季鹿三保河北江營山寨青
白口朝天寨水谷懽谷東安寨隸之遼州刺史行元帥
府事郭文振為晉陽公以河北東路皆隸之遼州招撫

使胡天祚為平陽公以平陽晉安府隰吉州隸之昭義
節度使完顏伯開為上黨公以澤潞沁州隸之山東安
撫副使燕寧為東昌公以益都府路皆隸之九公皆兼
宣撫使總帥本路兵馬署置官吏徵歛賦稅賞罰號令
得以便宜行之除已畫定所管州縣外如能收復鄰近
州縣者亦聽管屬 五月丙辰蒙古兵徇金兗州泰定
軍節度使完顏威赫死之 六月癸酉賜禮部進士劉
渭以下四百七十五人及第出身是榜得葉味道劉若

水時史彌遠柄國久若水對策極論其姦請罷之更命
賢相否則必為宗社憂考官寘之末甲策語播行都士
爭誦之彌遠怒諭府尹使逆旅主人譏其出入將寘之
罪久之乃已 丁丑蒙古取金大名府又攻開州及東
明長垣等縣 李全自化湖陂之捷有輕諸將心以連
水忠義副都統李先威望出己上陰結賈涉吏莫覬譖
先欲反涉信之壬午命先赴樞密院議事於道殺之而
遣統制陳選總先衆于連水先部曲裴淵宋德珍孫德

正王義深張山張友矩選不納迎石珪于盱眙奉為統帥涉分珪軍為六請于朝出修武京東路鈐轄印誥各六授淵等淵等陽從命而實不奉涉教令涉恐甚詔以珪為連水忠義軍統轄 追謚周敦頤曰元程頤曰純程頤曰正 秋七月戊戌以京東河北諸州守臣空名告身付京東河北節制司以待豪傑之來歸者 丙午以任希夷參知政事 金使烏庫哩仲端如蒙古求和呼蒙古主為兄蒙古主不允 八月癸亥皇太子詢卒

謚景獻 金長清令嚴實為主將所疑挈家壁于青崖
堌依益都張林以避之會趙拱以朝命諭京東過青崖
實因求內附拱奉實欵至楚州賈涉以聞實分兵四出
所至州縣皆下於是太行之東皆受實節制實乃舉魏
博恩德懷衛開相等郡來歸涉再遣拱往諭配以兵二
千李全亦請往涉不能止乃帥楚州及盱眙忠義萬人
以行拱說全曰將軍提兵渡河不用而歸非示武也今
乘勝取東平可乎全乃合張林軍得數萬襲東平之城

南金行省蒙古綱帥師固守全索戰不得乃與林夾沒水而砦明日金監軍王庭玉以騎兵三百奄至全欣然上馬帥帳前騎赴之殺數人奪其馬遂北抵山谷遇金龍虎上將軍額布特盛兵以出旁有繡旗女將馳鎗突厥全幾不免諸將赴援拔全出退保長清精銳喪失大半全恐所擄鎮江軍五百人懷憤乃使拱將之先歸而自以餘衆道瀘州假鹽利慰贍之尋還楚州 張林攻金瀘州王福以城降 壬申安丙遺夏人書定議夾攻

金以夏兵野戰我師攻城遂命利州統制王仕信帥師
赴熙秦鞏鳳翔委丁焻節制且傳檄招諭陝西五路官
吏軍民 甲申復海州以徐晞稷知州事 夏取金會
州金陝西行省與夏議和 蒙古穆呼哩至滿城使蒙
古巴哈將輕騎三千出倒馬關適金恒山公武仙遣葛
鐵槍攻臺州蒙古巴哈與之遇葛鐵槍戰敗仙舉城降
史天倪說穆呼哩曰今中原已漸定而大兵所過猶縱
鈔掠非王者弔民伐罪之意且王為天下除暴豈可效

他軍所為乎穆呼哩善之下令禁剽掠遣所俘老幼軍中肅然九月辛卯夏遣樞密使寧子寧率衆二十萬圍翠州且來趣兵甲午太白晝見王仕信帥師發宕昌乙未四川宣撫司統制質俊李寔帥師發下城戊戌安丙命諸將分道進兵沔州都統張威出天水利州副都統程信出長道興元都統陳立出大散關統制田胄出子午谷金州副都統陳昱出上津己亥張威下令所部諸將毋得擅進諸將遲疑庚子質俊等克

來遠鎮敗金人于定邊城辛丑王仕信克鹽川鎮乙巳
程信王仕信引兵會夏人于鞏州城下丁未攻城不克
遂趣秦州丙辰夏人自安遠砦退師 冬十月丁巳朔
程信復邀夏人共攻秦州夏人不從信自伏羌城引兵還
諸將皆罷兵戊寅程信以宣撫司命斬王仕信于西和州
罷張威官 時青與叔父全俱為禦賊及楊安兒劉二
祖敗青承赦降隸軍中為濟州義軍萬戶後附李全來
歸處之龜山有衆數萬至是金元帥赫舍哩約赫德遣

人招之青以書乞假邳州以屯老幼當襲取盱眙盡定淮南以贖罪金主乃以青為濟州宣撫使封滕陽公使領本處兵馬而未授以邳十一月庚戌大風壬子臨安府火著作郎吳泳上疏曰京城之災京城之所見也四方有敗陛下亦得而見之乎夫慘莫慘于兵也而連年不戢則甚於火矣酷莫酷于吏也而頻歲橫征則猛于火矣閩之民困於火矣浙之民困于水蜀之民困于兵橫斂之原既不澄於上苞苴之根又不絕於下譬彼壞

木疾用無枝而內涸之形見矣。蒙古穆呼哩既戢士
卒州郡悅附遂以輕騎入濟南嚴實挈所部三府六州
戶三十萬詣軍門降穆呼哩承制拜實行尚書省事實
將李信乘實出殺其家屬來降實攻信殺之復取青崖
嶺以魏博等郡降蒙古時金兵二十萬屯黃陵岡遣步
卒二萬襲穆呼哩于濟南穆呼哩迎戰敗之遂薄黃陵
岡金兵陣河南岸穆呼哩令騎下馬短兵接戰金兵大
敗溺死者衆穆呼哩遂陷黃陵岡進取楚丘由單州趣

東平圍之 蒙古耶律楚材進庚午元歷楚材遼東丹王托雲八世孫金尚書右丞履之子貞祐三年為中都行省員外郎中都陷降于蒙古蒙古主嘗訪遼宗室召楚材謂之曰遼金世讐吾為汝報之矣楚材對曰臣祖父以來嘗北面事之既為臣子豈敢復懷二心讐君父耶蒙古主重其言命處左右備訪問楚材通術數之學尤邃于太玄時從征西域以金大明厯不應製庚午元歷上之蒙古主每征伐必令楚材預卜吉凶亦自灼羊

脾以符之然後行。連水忠義軍統轄石珪以入連水。
非賈涉意心懷不安。李全復請討珪涉。遂以全兵列于
楚州之南。渡門移淮陰戰。艦于淮岸示珪有備。因命一
將招珪軍來者增錢糧不至者罷支給衆心遂散。十二
月壬申。珪殺裴淵。挾孫武正宋德珍降于蒙古。穆呼哩
以珪為元帥。珪既去。連水之衆未有所屬。李全求並將
之。涉不能卻。遂以付全。鎮江副都統翟朝宗得璽于
金師獻之。其文曰皇帝恭膺天命之寶。時青復自金

來附以為京東鈐轄 金兵固守東平穆呼哩謂嚴實
曰東平糧盡必棄城去汝即入城安輯之勿苦郡縣以
敗事留索隆噶圖以蒙古兵守之以嚴實權行省遂北
還 金易水公靜安民出兵至礮山取擔車寨會蒙古
圍安民所居山寨守寨者以安民妻子及老幼出降安
民軍中聞之駭亂衆議欲降以保妻子安民不從為其
下所殺 是歲蒙古主攻西城蒲華城塔什干城鄂托羅
爾城皆克之 遼王耶律璫格卒蒙古以其妻約尼氏

佩虎符權領其衆

十四年春正月乙未地震 以李全還自山東賜絹錢六萬 二月戊辰金人圍光州己巳金人犯五關壬申金人治舟于團風弗克濟遂圍黃州分兵破諸縣又遣別將犯漢陽軍 李全攻金泗州赫舍哩約赫德救之全敗乃還甲申詔淮東京湖諸路應援淮西江沿制置司防守江面 三月丙戌鄂州副都統扈再興引兵攻唐州 黃州被圍知州何大節取郡印佩之誓以死守

丁亥夕輿兵忽奔告曰城陷矣擁之登車纔出門而敵衆已集大節竟自沉于江 庚寅長星見 己亥金人陷蘄州知州李誠之家人皆赴水死然後自殺官屬亦多死者詔皆褒贈為誠之立廟于蘄州 癸丑金人退師扈再興邀擊敗之于天長鎮 夏四月戊辰金人渡淮北去李全遣兵追擊敗之 金東晉公燕寧與蒙古兵戰敗死 五月甲申朔日有食之 壬辰史彌遠等上孝宗寶訓皇帝會要 丙申西川地震 蒙古久

圍東平餉道絕行省蒙古綱監軍王庭玉不能守率衆南趣邳州蒙古索隆噶圖邀擊斬首七千級嚴實入城建行省于府第薩喇遠以穆呼哩命中分其城以嚴實撫安東平以北恩博等州石珪移治曹州 六月丙寅詔以皇姪福州觀察使貴和為皇子初帝以景獻太子卒國本未立選太祖十世孫年十五以上者教育宮中如高宗擇普安恩平故事至是遂立為皇子更名竑進封祁國公 乙亥以宗室子與莒為秉義郎與莒燕懿

王德昭之後希臘子也母全氏家于紹興之山陰初慶元余天錫為史彌遠童子師性謹愿彌遠器重之彌遠在相位久皇子竑深惡之念欲有廢立以沂王置後為名陰擇宗室中可立者以備皇子之選天錫告還秋試彌遠密語之曰沂王無後宗子賢厚者具以來天錫舟抵越西門天大雨過全保長家保長知其為丞相客治具甚肅有二子侍立天錫異而問之保長曰此吾外孫也日者言二兒後極貴問其姓長曰趙與莒次曰與芮

還臨安以告彌遠因命召二子來保長大喜鬻田治衣
冠集姻黨送之且詫其遇及見彌遠善相大奇之恐事
泄遽使歸保長大慙其鄉人亦竊笑之逾年彌遠謂天
錫曰二子可復來乎天錫召之保長謝不遣彌遠乃使
天錫密諭保長曰二子長者最貴宜還撫于其父家遂
載至臨安及貴和立為皇子乃補與莒秉義郎賜名貴
誠年十七矣 秋七月丁未修光宗寶訓 八月乙卯
知樞密院事任夷罰 賜史彌遠家廟 壬戌以兵部

尚書宣繪同知樞密院事給事中俞應符僉書樞密院事
乙丑追封史浩為越王改謚忠定配享孝宗廟庭
京湖制置大使趙方卒方少從張栻學舉進士知青陽
縣告其守史彌遠曰催科不擾是催科中撫字刑罰無
差是刑罰中教化人以為名言守襄漢十年以戰為守
合官兵兵為一體通制總司為一家許國之忠應變之
畧隱然有樽俎折衝之風故金人擾邊淮蜀大困而京
西獨全能用人如陳旼游九功輩皆拔為大吏扈再興

孟宗政皆起自土豪推誠擢任致其死力卒為名將故能藩屏一方使朝無北顧之憂既歿人皆思之 九月癸未立果州團練使貴誠為沂靖惠王後貴誠凝重寡言潔修好學每朝參待漏他人或笑語貴誠獨儼然出入殿庭矩度有常見者歛容史彌遠益異之 冬十月復滄州 甲寅復以齊州為濟南府兗州為龍慶府丙寅夏人復以書至四川趣會師伐金 初蒙古穆呼哩由東勝州涉河引兵而西夏主聞之懼遣塔海監府等

宴穆呼哩於河南且遣特爾格將兵五萬屬焉至是
穆呼哩引兵東行入葭州金將王公佐遁穆呼哩以石
天應權行臺守葭而自將攻綏德破馬蹄克戎兩寨夏
主遣密布帥衆會之密布問穆呼哩相見之儀穆呼哩
曰汝主見我主即其禮也密布曰未受主命不敢拜乃
引衆去十一月穆呼哩進攻延安密布始質馬而拜金
元帥哈達與納哈塔邁珠禦之哈達以兵三萬陳于城東
蒙古將蒙古巴哈先以騎士三千趣之夜半蒙古穆呼

哩命軍士銜枚潛進伏於城東兩谷中次日蒙古巴哈
望見金兵佯棄旗鼓走金兵追之穆呼哩出伏乘其後
鼙鼙震天金兵大亂穆呼哩追殺七千餘人哈達走入
延安城堅壁不出穆呼哩以城池堅深猝不可拔乃留
軍圍之而自將兵徇鄜坊等州 己亥四川宣撫使安
丙卒命崔與之為四川制置使以代之丙握重兵久每
忌蜀師之自東南來者諸將多不協和與之開誠布公
戒以同心體國之大義人人悅服軍政始立 京東安

撫張林叛降于蒙古先是李全既並將連水忠義益驕
悍輕朝廷嘗遊金山作佛事以薦國殤知鎮江府喬行
簡以方舟逆全大合樂以享之全歸語其徒曰江南佳
麗無比須與若等一到始造艤船謀爭舟楫之利膠
西當登寧海之衝百貨輻輳全使其兄福守之為窟宅
時互市始通北人尤重南貨價增十倍全誘商人至山
陽以舟浮其貨而中分之自淮轉海達于膠西福又具
車輦之而稅其半乃聽往諸郡貿易車夫皆督辦于張

林林不能堪林財計仰六鹽場福恃弟有恩于林欲分其半林許福恣取鹽而不分場福怒曰若背恩耶待與都統提兵取若頭耳林懼其黨李馬兒說林叛林遂以京東諸郡請降于蒙古穆呼哩以林行山東東路益都瀋景濱棣等州都元帥府事福狼狽走還楚州十二月庚申知樞密院事鄭昭先罷閏月遣苟夢玉如蒙古通好蒙古尋遣阿哈齊遜來報金更作興定寶泉每一貫當通寶四百貫蒙古攻金鄜州節度使完顏

魯沁鈕祜祿資祿都統赫舍哩鶴壽富察羅索皆死之時石天應擒送金駢將張鐵槍穆呼哩責其不降厲聲答曰我受國恩厚恩二十餘年今有死而已穆呼哩義之欲解其縛諸將怒其不屈遂遇害蒙古取金坊州是歲蒙古主及皇子卓沁察罕台謫格德依攻下西域布哈爾賽瑪爾堪等十餘城

十五年春正月庚戌朔御大慶殿受恭膺天命之寶先是翟朝宗得璽獻于朝既而趙拱又得玉印文與前璽

同而加大朝廷喜受之行慶賀禮大赦賈涉遺書史彌遠謂天意隱而難知人事切而易見當思今日人事尚未有可答天意者昔之患不過亡金今之患又有山東忠義與北邊宜亟圖之彌遠不憚丁巳詔撫諭山東河北軍民將帥官吏二月秘書郎何澹奏有司出題強裂句讀專務斷章破碎經文望令革去舊習使士子明綱領而識體要考注疏而辨異同從之夏四月金主以朝廷絕歲幣國用困乏乃命元帥左監軍額克行

元帥府事節制三路軍馬同僉書樞密院事時全副之
由頴壽進渡淮敗官軍于高塘市攻固始縣破廬州將
焦思忠兵既而獲生口言時全之姪青受宋詔與全兵
相拒全匿其事五月額克引衆還距淮二十里諸軍將
渡全矯稱密詔諸軍且留收淮南麥遂下令人獲三石
以給軍衆惑之留三日額克謂全曰今淮水淺狹可以
速濟若值暴漲宋乘其後將不得完歸矣全力拒之是
夕大雨淮水暴漲乃為橋以渡官軍襲之全兵大敗橋

壞全以輕舟先濟士卒皆覆沒金之兵財由是大竭金
主詔數全罪而誅之 庚戌太白晝見 丁巳進封皇
子初國公竑為濟國公以沂王嗣子貴誠為邵州防禦
使竑好鼓琴史彌遠買美人善鼓琴者納諸竑而厚撫
其家使瞞竑動息美人知書慧黠竑嬖之時楊皇后專
國政彌遠用事久宰執侍從臺諫藩閫皆所引薦莫敢
誰何權勢熏灼竑心不能平嘗書楊后及彌遠之事於
几上曰彌遠當決配八十里宮壁有輿地圖竑指瓊崖

曰吾他日得志置史彌遠於此美人以告彌遠竑又嘗呼彌遠為新恩以他日非新州則恩州也彌遠聞之因七月七日進乞巧奇玩以覘其意竑乘醉碎之於地彌遠大懼日夜思以處竑而竑不知真德秀時兼宮教諫竑曰皇太子若能孝於慈母而敬大臣則天命歸之矣否則深可慮也竑不聽一日彌遠為其父浩飯僧淨慈寺與國子學錄鄭清之登慧日閣屏人語曰皇子不堪負荷聞後沂邸者甚賢今欲擇講官君其善訓導之事

成彌遠之座即君座也然言出於彌遠之口入于君之耳若一語泄吾與君皆族矣清之曰不敢乃以清之兼魏惠憲王府學教授清之日教貴誠為文又購高宗御書俾習焉清之謁彌遠即示以貴誠詩文翰墨譽之不容口彌遠嘗問清之曰吾聞皇姪之賢已熟大要竟如何清之曰其人之賢更僕不能數然一言以斷之曰不凡彌遠領之再三定策之意益堅乃日媒孽竑之失言于帝覬帝廢竑立貴誠而帝不悟真德秀聞其事力辭

去臨行復以前言進於竑竟不聽 壬戌知濟南府種
贊討張林林敗走李全入青州據之 六月辛卯僉書
樞密院事俞應符卒 秋七月蒙古穆呼哩徇金青龍
堡平陽公胡天作降穆呼哩遂趣關中使蒙古巴哈守
京兆以備潼闕按札爾次晉安冀州之境 八月己卯
彗星出于氐蒙古耶律楚材謂其主曰女真將易主矣
甲申金以彗見改元元光大赦 九月大名忠義彭
義斌復京東州縣嚴實將晁海以青厔嶧降 辛亥以

宣繪參知政事給中程卓同知樞密院吏部尚書薛極
賜出身僉書樞密院事癸丑雷大雨雹壬戌彗星
沒辛未太白晝見是秋金遣烏庫哩仲端請和于
蒙古蒙古主曰我向欲汝主授我河朔地令汝主為河
南王彼此罷兵汝主不從今穆呼哩已盡取之乃始來
請邪仲端乞哀蒙古主曰念汝遠來河朔既為我有關
西數城未下者其割付我令汝主為河南王勿復違也
仲端乃歸冬十月蒙古穆呼哩取金河中所過州縣

皆下時金于牛心寨僑治吉州事穆呼哩自隰州攻之
知州楊貞令妻孥先墜崖死已從之穆呼哩入寨留兵
以守使蒙古巴哈引遊騎出秦隴為聲援視山川夷險
自將兵下孟州晉陽霍邑等寨召石天應謂之曰河中
為河東要郡擇守者非君不可乃以天應權行臺平陽
太原吉隰等帥並受節制穆呼哩遂趣長安使烏古納
台哈巴哈屯守之遣安齊將兵斷潼關金王庭玉取曹州
殺蒙古將石珪十一月蒙古穆呼哩取金同州節度

使完顏額克死之 十二月丁亥以李全為保寧軍節
度使京東路鎮撫副使初全有戰功史彌遠欲加全官
賈涉止之及是涉歎曰朝廷但知官爵可以得其心寧
知騎則將至於不可勸耶 是歲蒙古皇子托壘克西
域圖薩鼐察珠爾等城還經塔喇噶國大掠之渡蘓蘓
勒河克伊犁等城遂與蒙古主會合兵攻達爾罕寨拔
之西域主扎拉丹出奔與穆爾汗合呼圖克與戰不
利蒙古主自將擊之擒穆爾汗扎拉丹遁去遣巴爾

追之不獲進薄回國其王委國而去逃匿海嶼死

十六年春正月乙酉皇子竑生 蒙古穆呼哩攻鳳翔
府晝夜苦戰四十餘日不下將由河中北還金元帥右
都監侯小叔襲河中破之殺石天應焚浮橋而退穆呼
哩以天應子幹可領其衆初金主命元帥都監阿嚕岱
守河中阿嚕岱恆怯不能軍竭民力以事浚築及絳州
破阿嚕岱懼馳奏河中孤城不能守金主謂果不可守
則棄之無至資敵阿嚕岱遂棄河中焚民居官舍尋有

言河中重鎮國家之基本所在為敵所據則大河之險
我不得專恃矣金主命有司復修葺之終不能成隨守
隨陷

二月戊子雨土已丑嗣秀王師禹卒追封和王

戊戌皇子姪卒追封邳王謚冲美

三月戊申張林

所部邢德來歸詔進二官以為京東東路副總管

蒙

古穆呼哩自河中帥師還至解州聞喜縣疾篤謂弟岱

遜曰我為國家助成大業擐甲執銳垂四十年無復遺

恨所恨者汴京未下耳汝等勉之言訖而卒穆呼哩雄

勇善謀與博爾濟博勒呼齊拉袞俱以忠勇事主號為
庫爾本庫魯克華言四傑也蒙古主軍嘗失利天大雪失
牙帳所在夜卧草澤中穆呼哩與博爾濟張檻蔽之自
暮達曉不移足博爾濟從征伐立功甚多極見親位終
右萬戶博勒呼身更百戰竟死于陣位終第一千戶齊
拉袞功業與三人者等四人之子孫皆領宿衛號四集
賽出官則為輔相夏五月戊申賜禮部進士蔣重珍
以下五百四十九人及第出身蒙古主避夏于八魯

灣川分兵攻諸部落之近者悉下之至扣肯寨與諸將
會以西域漸定始置達嚕噶齊於各城監治之達嚕噶
齊華言掌印官也六月壬午淮東制置使賈涉以李
全騎暴難制力求還朝在道卒初涉欲制忠義兵乃以
翟朝宗統鎮江副司八千人屯楚州城中又分帳前忠
義萬人命趙邦永高友統五千屯城西王暉于潭統五千
屯淮陰李全輕鎮江兵而忌帳前忠義乃數稱高友等
勇出軍必請以自隨涉不許全每宴麾下並召涉帳前

將校於是帳前亦願隸全然未能合也及涉卒丘壽邁
攝帥事全請曰忠義烏合尺籍鹵莽莫若別置新籍一
納諸朝一申制闈一留全所庶功過有攷請給無弊壽
邁從之全乃合帳前忠義與己軍盡隸之而並統其軍
壽邁不悟 丁酉同知樞密院事程卓卒 秋八月辛
未朔金邳州從宜經畧使納哈陸格率衆殺行尚書省
完顏綱據州反與蒙古將李二措致書海州言欲來附
李全遣王喜兒以兵二千應接而已繼之二措納喜兒

因之全欲攻邳四面限水二措積勁弩備之全不得進
合兵索戰而敗欲還楚州會濱棣有亂乃引兵趣青州
金行院總帥雅克台討殺陸格復其城 九月庚子朔
日有食之 冬十一月辛亥以太平州大水詔賑恤之
十二月以前淮西都統許國為淮東制置使兼知楚
州國奉祠家居欲傾賈涉而代之數言李全必反涉卒
會召國入對國疏全姦謀益深反狀已著非有豪傑不
能消弭遂易國文階授今官命下聞者驚愕淮東參幕

徐晞稷雅意開闢及聞國用乃注釋國疏以寄全全不
樂癸未嗣濮王不凌卒庚寅金主珣殂年六十一
太子守緒即皇帝位金主疾革時已暮夜近臣皆出惟
前朝資明人鄭氏以年老侍側金主知其可託謂之曰
速召太子主後事言絕而殂夫人秘之是夕皇后及貴
妃龐氏問安寢閣龐氏陰狡機慧常以其子英王守純
年長不得立懷怨鄭氏恐其為變即給之曰上方更衣
后妃可少休他室伺其入遽鑰之急召大臣傳遺詔立

皇太子守緒始啟戶出后妃發喪太子方入宮英王已
先至太子知之分遣樞密院官及東宮親衛軍官伊喇
布哈集軍三萬餘于東華門街部署既定命護衛四人
監守純于近侍局乃即位樞前宣遺詔 壬辰雷 蒙
古兵攻夏夏主遵頊傳國于其子德旺改元乾定遵頊
自號上皇 蒙古蘇布特擊欽察滅之大掠西番邊部
而還

十七年春正月戊戌朔詔補先聖裔孔元用為通直郎

錄程頤後 金改元正大 三月癸丑雪 召四川制
置使崔與之為禮部尚書以鄭損代之與之治蜀將士
輯睦府藏充實至是被召以疾辭歸廣州蜀人祠焉
金人遣尚書令史李唐英至滁州通好 夏四月乙未
賜李全彭義贊錢三十萬緡為犒賞戰士費 六月丁
卯朔太白經天晝見 壬辰金大名府蘇椿等舉城來
歸詔悉補官即以其州授之金遣樞密云云彭義贊侵
河北至恩州為蒙古史天倪所敗 秋七月辛亥命師

吳嗣秀王 八月丙戌帝不豫史彌遠遣鄭清之往沂
王府告貴誠以將立之意貴誠默然不應清之曰丞相
以清之從遊久故使布腹心今不答一語則清之將何
以答丞相貴誠始拱手徐言曰紹興老母在清之以告
彌遠益相與歎其不凡壬辰帝疾篤彌遠稱詔以貴誠
為皇子改賜名昀授武泰軍節度使封成國公閏月丁
酉帝崩于福寧殿年五十七彌遠遣皇后兄子谷石以
廢立事白后不可曰皇子竑先帝所立豈敢擅變谷等

一夜七往返後終不許谷等乃拜泣曰內外軍民皆已
歸心苟不立之禍變必生則楊氏無噍類矣后默然良
久曰其人安在彌遠即於禁中遣快行宣昀令之曰今
所宣是沂靖惠王府皇子非萬歲卷皇子苟誤則汝曹
皆處斬竑時聞帝崩跂足以需宣召久不至乃屬自
牆壁間見快行過其府而不入疑焉已而擁一人徑過
天暝不知為誰甚惑之昀入宮見后后拊其背曰汝今為
吾子矣彌遠引昀至極前舉哀畢然後召竑竑聞命

即赴至則每過宮門禁衛拒其從者彌遠亦引竑至柩前舉哀畢引出帷殿帥夏震守之遂召百官立班聽遺制則引竑至舊班竑愕然曰今日之事我豈當仍在此班震給之曰未宣制前當在此宣制後乃即位竑以為然已而遙見殿上燭影中有人在御座則竑已即位矣宣制畢閤門宣贊呼百官拜贺竑不肯拜震捽其首下拜遂稱遺詔以竑為開府儀同三司封濟陽郡王判寧國府尊皇后曰皇太后垂簾同聽政詔遵孝宗故事宮中自服三年喪尋封竑為濟陽王出居湖州

史臣曰寧宗恭儉守文初年以舊學輔導之功召用宿儒引拔善類其政可觀中更韓侂胄用事內蓄羣姦指正為偽外挑強隣流毒淮甸函首求成國體虧矣及史彌遠擅權幸帝耄荒竊弄威福至於皇儲國統亦得乘機伺間遂其廢立之私他可知也

九月史彌遠欲收衆望勸帝褒表老儒遂下詔起傅伯成為顯謨閣學士楊簡為寶謨閣學士及柴中行俱奉朝請伯成簡辭不至 己卯以真德秀及禮部侍郎程

秘吏部侍郎朱著並兼侍讀工部侍郎葛洪起居郎喬
行簡宗正少卿陳貴誼軍器監王暨並兼侍講尋又以
真德秀直學士院召魏了翁為起居郎德秀初為起居郎
人兼東宮講官言事不避權貴且惓惓於復讐知史彌
遠欲以爵祿縻天下士慨然謂劉爚曰吾徒須急引去
使廟堂知世亦有不肯為從官者遂力請外至是自知潭
州召還入對勸帝容受直言召用賢臣固結人心為本
帝納之帝追封所生父希璽為榮王生母全氏為國

夫人而以弟尚嗣之 冬十月己亥嗣秀王師亟卒

夏及金平初夏人與金通好不交兵者八十年至貞祐
初以小故生釁構難十年一勝一負遂至精銳俱盡兩

國皆弊至是夏遣其吏部尚書李仲諤修好於金稱

弟而不臣各用本國年號金遣禮部尚書鄂屯良弼報

之

考異金史哀宗紀正大元年十月戊午夏國遣使來
修好二年九月夏國和議定以兄弟金各用本國年

號遣使來歸奉國書稱書十月遣禮部尚書鄂屯良弼
等為夏國報成使國書稱兄西夏傳正大元年和議成

自稱兄弟之國按夏國和議之
成紀云二年傳云元年今從傳

十一月甲子右正言

靡漂請承順東朝繼志述事一以孝宗為法而新政之
切者曰畏天悅親講學仁民帝嘉納之 癸未以五月
十六日為皇太后壽慶節 丁亥詔改明年為寶慶元
年 戊子以工部尚書葛洪同僉書樞密院事 己丑
詔以生日為天基節 十二月癸丑開經筵詔輔臣觀
講 名皇太后所居殿曰慈明 是歲蒙古主進次東
印度國鐵門關侍衛見一獸鹿身馬尾綠色而獨角能
為人言曰汝君宜早回蒙古主怪之以問耶律楚材對

曰此名角端解四夷語是惡殺之象今大軍征西已四年上天惡殺遣告陛下願承天心宥此數國人命實無疆之福蒙古主遂大掠而還

考異陳涇通鑑續編此事繫嘉定十五年壬午按元史太祖紀十九年甲申歲帝至東印度國角端見班師甲申乃宋嘉定十七年也今從之印度一作忻都

資治通鑑後編卷一百三十六